

# INUIT ATAQATIGIIT

## INATSISARTUNI



Nuuk, 2. november 2011

Inatsisartut suleriaasianni § 37 naapertorlugu matumuuna imaattunik Naalakkersuisunut apeqquteqarpunga:

(Inatsisartuni ilaasortaq Isak Hammond, Inuit Ataqtigiiit)

### Apeqqutit:

1. Qilalukkanik qernertanik pisassiinermi amerlassusiliinermilu suut toqqam-maviit aallaaviusimappat?
2. Killilersuisoqalernerup kingunerisaanik qilalukkat qernertat qanoq amerlatigilersimanerat ilisimaneqarpa?
3. Upernaviup eqqaani unqusilluni qilalugarniartarnerup uninnerata kingunerisaanik, amerlassutsinut tamanna qanoq sunniuteqarnera ilisimaneqarpa?
4. Ukioq mannamut pisassiisutiqeqarsimasut amerlineqarnissaat kissaatiginarpoq, taamaaliortoqarniarpa?
5. Ilisimasarpummi tassaavoq qilalukkat annertuumik qaleralinnik nerisaqarnerat, amerlavallaalerunillu qaleraeqassutsimut sunniuteqarnerlussinnaanerat taamaattumillu tamanna oqimaaqatigiissinniagassaavoq. Tamanna nerisaqatigiinneq eqqarsaatigalugu iliuuseqarfigineqarniarpa?

### Tungavilersuut:

Ukioq manna ukiut arlaqalerput killilersuisoqalerneraniik, tamannalu qanoq ilisimatusarnikkut kiisalu isigisat ilisimasallu aallaavigalugit tungaveqartineqarnersoq paasisaqarfigerusunnarpoq.

Aqutsinermi killilersuilernerullu kingunerisaanik, amerlassutsit qanoq inissisimanerat erseqqissumik malinnaavigineqarpa? Suut toqqamavigineqarpat taamatut pisassat killeqarnerannut?

Qilalugaqatigiiaat qernertat assigiinngitsuunerannut ilisimasat suut toqqammavigineqarpat? Oqaatigineqartartormi nalunngisarput tassaavoq Nunatsinni qernertanik qilalugaqatigiiaat assigiinngitsuunerannik piniartut oqaatigisaqartarnerat asuliinnaanngitsuusoq. Taakkualu suminngaanneertarnerat ilisimaneqarpa?

Ilisimasarput alla pingaarutilik tassaavoq Upernaviup eqqaani qanga unqusilluni qilalugarniartarnerup unitsinneqarsimanera tamanna qilalugaqassutsimut sunniuteqarnerlummat. Oqaatigisariaqartorlu tassaavoq Upernaviup eqqaani unqusinikkut ukiumut pisarineqartartut mianersortumik kisitsisiliilluni 400 – 600-llu akornannut amerlassusilerneqartarnerat. Taamaattorli pisarineqartartut kisitsisinit taaneqartunit amerlanerusinnaanerat ilimagineqarsinnaavoq, tassami unqusilluni qilalugarniartarnermi qanoq amerlatigisunik pisaqartoqartarsimanersaq maannamut erseqqissumik takussutissiisoqarnikuunngilaq.